

四庫全書

史部

欽定四庫全書

史部

宋朝事實卷七至九

詳校官編修臣范來宗

編修臣程嘉謨覆勘

總校官降調編修臣倉聖脉

校對官中書臣張敦培

謄錄監生臣丁煌

欽定內庫全書

宋朝事實卷七

宋 李攸 撰

道釋

建隆初太祖遣使詣真源祠老子于京城修建隆觀觀
在閭闔門外周世宗建曰太清觀帝命重修賜今名自
是齋修率就是觀自五代以來道流庸雜乾德五年右
街道錄何自守坐事流配乃詔萊州道士劉若拙為左

街道錄

案左街道錄原本闕街字今從李焘長編增入

俾之肅正道流開寶五

年閏二月詔曰冲妙之門清淨為本逮于末俗頗玷真

風或竊服冠裳寓家宮觀所宜懲革以副欽崇兩京諸

州士庶稱奇詭者一切禁斷其道流先有家屬同止者

速遣出外自今如願入道者須本師與本觀知事同詣

長吏陳牒請給公驗方許披度十月又令若拙與功德

使集京師道士試驗其學業至而不修飭者皆斥之若

拙蜀人自號華蓋先生善服氣養生九十餘歲不衰步

履輕捷每水旱必召于禁中致禱其法精至上甚重之
大中祥符元年增宮名曰玉清昭應凡役工日三四萬
發京東西河北淮南州軍禁軍調諸州工匠每季代之
兵卒歲一代並優其口糧資值選四廂都指揮使忠佐

二員董役

案宋初有軍頭司引見司端拱元年並冠稱御前忠佐詳見文獻通考此云忠佐從省文

立賞格以勸其所用木石則有秦隴岐同之松嵐州汾
陰之栢潭衡道永鼎吉之杉松桐楮温台衢婺之豫章
明越之松杉其石則淄鄭之青石衛州之碧石萊州之

白石絳州之斑石吳越之奇石洛水之玉石其采色則
宜聖庫之銀硃桂州之丹砂河南之赭土衢州之朱土
梓州之石青石綠磁相之黛秦階之雌黃廣州之藤黃
孟澤之槐花號州之鉛丹信州之黃土河南之胡粉衛
州之白堊鄆州之螺粉兗澤之墨宣歙之漆賈谷之望
石萊蕪興之鐵其木石皆遣所在官部押兵民入山谷
伐取挽輜車泛舟航以至餘皆分布部綱輸送又于京
師置務化銅為鋸冶金箔鍛鐵以給用凡宮之東西三

百一十步南北四百三十步地多黑土疏惡于京東取

良土易之自三尺至一丈有六等上以負擔之勞令自

新城濠由廣濟濠入舊城濠抵宮門

宋李燾長編上以道里稍遠今丁謂

等議謂等請用車載土上曰挽舟止役十人而土可速致令三司以空船給昭應宮運土浚治渠道自新城北

濠入與此所載詳畧互異

兵匠供茶酒飲食網卒皆給鞋錢衣屨口

糧民以材木鬻于官者蠲其算或有獻良木者優賜其

值車駕時來省視必有賜賚遇節序日別賜燕會及宮

成令長吏于采木石處建道場以謝五年聖祖司命天

尊降臨改奉尊像于玉皇後殿東建司命殿為治事之所十一月詔名玉皇殿曰太初聖祖殿曰明慶天書閣曰寶符凡宮殿門名無慮五十餘所皆御製賜名親書填金有司具黃麾仗道門威儀奉迎至宮奉安東西山院在集靈凝命之旁皆累石為山引流水為池東有昆玉亭澄虛閣昭德殿西有瑤峯亭涵暉閣昭信殿

原註山院

常局鑄中設茵褥屏風棊枰琴阮之屬

北門內二宴殿曰迎禧迎祥後二

殿曰崇慶崇福太初殿楚石為丹墀龍墀前置日月樓

畫太陽太陰像及環殿圖八十一太一東西廊圖五百

靈官前置石壇鐘樓經樓

原註上聞江西有鐘洪大遣使取之既而不堪用令李溥

就杭州別鑄重三萬斤

四隅置樓闕其外累甃為牆引金水為甃

渠環宮垣又分為二石渠貫宮中六年四月上望拜奉

迎丙午奉安肆赦門下國家重熙鼎盛席慶善之鴻基

百祿惟新承昊穹之蕃錫爰自綿區底定寶錄荐臻叶

千歲之昌辰舉一王之茂典肇營恭館式耀丕圖偉嘉

會以元亨荷太靈之昭格昔者九龍垂馭啓道德之仙

源五老告期顯唐虞之瑞命天人交應古今同符昨以
鍊楚越之良金法紫清之妙像肅陳仗衛迎至國都榮
觀焜燿懽聲沸囂上真高聖凝三氣之殊姿英祖神宗
儼重瞳之粹質屬朝修之禮畢罄恪謹之誠深動色相
趨降祥允集宅靈祕宇永申崇奉之宜賜福羣倫宜霈
覃延之澤可大赦天下云云於戲昭事上帝惟懷永圖
克已彌恭務守盈成之業保民在念庶躋仁壽之鄉更
資同德之臣叶贊承平之治建安軍升為真州鎔范之

地建為儀真觀玉清昭應宮作于大中祥符元年至七

年十一月宮成

案宋史紀事本末十一月乙酉玉清昭應宮成初議營宮料工須十五年修宮

使丁謂令以夜繼晝每繪一壁給二燭故七年而成凡二千六百一十楹制度宏麗屋宇稍不中程式雖金碧已具劉承珪必令毀而更造所載較此為詳附錄備考

大中祥符元年建玉清昭應宮太初紫微殿寶符閣上

梁日上皆親臨護其日大合樂工人以文繒裹梁金飾

木寓龍負之輅以昇伶官讀文其上設機木散擲金錢

餅果修宮使以下及營繕掌事者賜以衣帶金帛有差

從官咸賜衣服金犀帶

大中祥符元年真宗建玉清昭應宮又奉四像御大舟
上設幄殿皆內侍主供具夾岸設黃麾仗三千人騎吹
四百別列舟十艘載門旗弓矢青衣弓矢及叉道衆幢
節經過州縣道門聲讚鼓吹振作官吏出城十里具道
釋威儀音樂迎拜所過禁屠宰止刑京師禁屠宰七日
止行刑二日甲辰聖像至上齋于長春殿百官齋宿朝
堂乙巳上袞服朝拜羣臣朝服陳玉幣冊文酌獻具大

駕鹵簿自宮城東出景龍門五使前導上望拜奉迎丙午奉安肆赦

真宗建天慶觀大中祥符二年十月詔曰朕欽崇至道誕受元符庶敦清淨之風永洽淳熙之化式營仙館以介民禧宜令諸路州府軍縣開擇官地建道觀或改舊宮觀名題而崇葺之以奉三清玉皇並以天慶為額五年閏十月詔增設聖祖殿惟西京謂之天慶宮天禧中各賜金寶牌

王捷者汀州人咸平初賈販至南康軍于逆旅遇道人
自言姓趙氏是冬再見于茅山命捷市鉛汞鍊之少頃
皆成金捷即隨至和州諸山得其術又授以小鏢神劍

密緘之戒曰非遇人主慎勿輕言捷詣闕求見不得乃

謀以罪名自達至信州陽狂大呼

案陽狂錦繡萬花
谷引此作佯狂遂

坐配隸嶺南未久逃至京師官司捕繫閤門祇候謝德

權知其有術即為奏請

案江少虞事實類苑捷逃至京
師過登聞鼓自陳與此互異

得釋乃解軍籍劉承珪聞其異為改名中正得對龍圖

閣具陳靈應特授許州參軍留止皇城廨舍時出遊廛市常有道人與之偶語云即向來授法司命真君也其語秘不傳承珪為創新堂駐之乃以景德四年五月十三日降于堂之紗幘中戴冠佩劍服皆青色自是屢降中正傳達其言凡有瑞異必先告之東封畢加號司命天尊及司命降臨延恩殿乃上聖祖之號每舉大禮及有營繕中正必達靈命以藥金銀來獻後改皇城新堂為元符觀中正累官至左神武軍大將軍康州團練使

後贈鎮南軍節度使塑其像于景靈宮

恭事實類苑捷卒贈嶺南節度

使謂之燒金王先生建祠元寧院西與此互異

上為製靈遇贊紀其始終九年

十月內出所進金命鑄為寶牌分給在京宮觀及外路

名山聖迹并天慶觀

原註寶牌長二寸許廣寸餘面文曰玉清昭應宮成天尊萬歲其背

文曰永鎮福地其周郭皆隱起龍蛇華葩之狀藥銀命鑄大錢大會道釋于天安殿賜之凡萬三千八十六人

其後著令凡官吏之官罷任並詣觀朝拜聖祖禁乘馬

輶入門及不得食葷茹厭遇天慶節許士庶焚香庭中

八年四月上命禮儀院備錄聖祖降臨置節建觀事狀

咸命刻石觀中

案錦繡萬花谷引此書云大中祥符五年十月聖祖降于延恩殿先是有汀州

人王捷者咸平初賈販于南康軍逆旅遇道人自言姓趙是冬再見于茅山命捷市鉛汞鍊之成金捷即隨至和州諸山又授以小鏡神劍曰非遇人主勿輕言捷詣闕求見不得乃謀以罪名自達至信州佯狂大呼遂坐配隸嶺南未久逃至京師閤門祇候謝德權知其有術即為奏請釋軍籍劉承珪聞其異為改名中正得對龍圖閣具陳靈異特授許州參軍留止皇城舍時出遊市嘗有道人與之偶語云即向來授法司命真君也承珪為創新堂駐之景德四年五月降于堂之紗幘中戴冠佩劍服皆青色凡有瑞異必先告中正傳達其言既降延恩殿前八日上夢景德中所覩神人傳玉皇之命是夕五鼓殿廷先聞異香少頃黃光自東南來燈燭失光俄見靈僊儀仗皆有光明天尊至冠服一如元始天尊之像旁有六人乘圭僊衣上再拜于階下俄有黃霧起

瀕史霧散天尊與六人皆坐上升西堦僊童捧湯飲一
器器類碧玉湯甘白如乳天尊曰吾人皇中九人之一
也是汝趙之始祖再降乃軒轅黃帝凡世所知少典之
子非也母感赤電夢天人生于壽丘後唐時七月一日
下降生趙氏之族今已百年皇帝善撫育蒼生無怠前
志即離坐乘雲而去及曉以語宰相等仍召至殿上觀
降臨之所先東封畢加封司命天尊及此降延恩殿恭
上九天司命保生天尊號曰聖祖上靈高道九天司命
保生天尊大帝聖祖名玄朗詔中外毋斥犯遂以聖祖
降臨之地建新宮名曰景靈宮琢玉石為聖祖像初聖
祖述感電降生之地改兗州曲阜縣為僊源壽丘建道
宮以景靈為名命宰相王曾紀述其事云云與下條誤
合為一條且多闕畧不若
此書原本為詳明足據也

聖祖以大中祥符五年十月戊午降于禁中延恩殿前

八日辛亥上夢景德中所覩神人傳玉皇之命即命內侍于延恩殿大設道場是夕五鼓一籌殿庭先聞異香少頃黃光自東南至燈燭失光俄見靈僊儀仗執香爐扇拂華奩之類皆有光明天尊至冠服一如元始天尊之像旁有六人四人秉圭僊衣二人通天冠絳紗袍案李燾長編云又六人皆秉圭四人僊衣二人通天冠絳紗袍與此小異上再拜于堦下俄有黃霧起須臾霧散天尊與六人皆就坐侍從在東堦上升西堦再拜又欲拜六人天尊令揖不拜命設榻台上

坐僊童奉湯飲一器器類碧玉湯甘白如乳天尊曰吾人皇中九人之一也是汝趙之始祖再降乃軒轅黃帝凡世所知少典之子非也母感赤電夢天人生于壽丘後唐時七月一日下降總治下方主趙氏之族今已百年皇帝善撫育蒼生無怠前志即離坐乘雲而去及曉以語宰相等仍召至殿上觀降臨之所十月二十五日大赦天下門下衆妙之宗蘊道樞而斯秘非常之應稽天眷以有孚事負絕于前聞理克彰于合契洪惟偉兆

實煥祥經朕猥以眇冲嗣承基業荷九清之眷命遵二
聖之詒謀不敢怠遑粗臻嘉靖頃以上真告貺秘檢垂
文祇膺元命之符申錫無疆之祚間歲之內盛典交修
秩衆祀以咸禋感靈心之允答彌懷惕厲愈務欽崇而
穹昊顧懷不忘于涼德神祇鑒燭薦發于休祥粵以冬
初警于宵寐戒先期而誕告約真馭以下臨宿設靈壇
仰祈鴻應果于穀旦肅奉晬儀僊霧鬱蔥異香芬郁衆
真列侍寶訓躬聞示基緒長發之祥見希夷交感之盛

久留局禁條返虛無惟瑞異之親逢曠古今而罕記載
循寡昧奚以奉承蓋祖宗在天永錫爾類而雷雨作解
恩及于民用均純嘏之休普泆龐鴻之慶可大赦天下
於戲至神善應既本于無方王澤誕敷俾周于有截匪
獨在予之慶式均與物之春內省匪躬荷茲殊貺彌增
抑畏罔敢違寧更賴文武蓋臣中外列辟共欽元誥各

勵乃誠叶宣永圖同底于道閏十月癸巳

案李燾長編
載閏十月己

已上天尊號乙亥上聖祖母懿號是月乙丑朔則己已
係五日乙亥十一日也此云癸巳乃二十九日又併二

事為一事
與長編異

恭上九天司命保生天尊號曰聖祖上靈高
道九天司命保生天尊大帝又上聖祖母號曰元天大
聖后車駕詣宮酌獻聖祖母玉冊文維天禧元年歲次
丁巳三月庚子朔六日乙巳嗣皇帝臣德昌再拜稽首
上言曰恭以大道無形為一氣之祖至神毓粹居二儀
之先洪惟靈懿無方柔明有赫總妙本而貴始啓真緒
以肇基顧以沖人嗣守鴻業夙持勵翼思致治平乃者
穹昊監觀秘符申錫祐綿長之祚曷清淨之風瑞命殊

尤景貺紛屬繇是勒封嶽岱展事汾睢既明察以交修
復祺祥而荐至僊馭告期于中禁晬儀來自于太霄法
從儼其音容諄誨受于清密諭感祥于大電聆毓聖于
高丘厚德孚先濬源長發猥紹貽謀之慶敢忘克荷之
艱享是休嘉永懷欽奉仰惟祖德之盛爰上丕稱而母
儀之尊未崇顯號斯所以順稽鉅禮式耀徽章允罄精
衷肅伸昭報謹奉玉冊玉寶恭上徽號曰聖祖母元天
大聖后恭惟誕膺茂典丕赫殊徵垂祐後昆永錫繁祉

謹言聖祖名

原註上
玄下朗

詔中外不得斥犯遂改玄武玄冥

玄枵之類並為真字玄聖文宣王為至聖七年詔曰恭
以感電發祥合符御極鴻靈累洽盛德無疆猥以眇姿
獲承大統躬聞寶訓述示遐源間覽庶僚每形奏牘或
傍稽于文史必上詣于名稱雖歸美之可嘉誠瀆尊之
是懼自今內外文字並不得指斥黃帝名字祥符五年
十二月遂以聖祖降臨之地建宮崇奉命修玉清昭應
宮使丁謂擇地及令禮官考制度以聞司天少監王希

元上言謹按天文志太微宮南有天廟星乃帝王祖廟也宜就大內之丙地營建于是得錫慶院吉壤即命丁謂與內侍鄧守恩等修建初八年正月丁酉聖祖述感電降生之地即以其年閏十月改兗州曲阜縣為僊源縣壽丘建道觀奉聖祖以景靈為名建道觀奉聖祖母以太極為名九年四月宮成凡一千三百二十二區觀北即壽丘東南有小丘改名慶丘以石增累壽丘設天尊像慶丘設壽星像上命宰相王曾紀述其事為書二

十卷賜名曰聖祖皇帝天源錄藏于天下名山福地

大中祥符八年正月丁酉始興太極觀工作七月丙辰
詔曰朕恭延飈馭逖悟璿源載懷尊祖之心用建列真
之宇顧惟宗姓實兆靈僊遂命樞密使王欽若討閱道
藏得趙氏神僊事迹四十八件宜令修宮使分畫廊廡
庶昭懿範永耀遐宗五月宮成凡七百二十六區正殿
曰天興琢玉石為聖像仍刻真宗聖容立侍

國初有神降于蓋屋縣民張守真家自言天之尊神號

黑殺大將軍玉帝之輔帝命乘龍降世衛護宋朝但非
棲真之士無以奉吾教守真有異骨吾故降之每守真
齋戒祈請神必降之則室中冷風肅然聲如嬰兒獨守
真能曉之具道其意所言禍福皆驗守真遂度為道士
即所居創北帝宮神為守真傳結壇之法曰結壇有九
上三壇則為國家設之其上曰順天興國壇凡星位三
千六百為普天大醮旌旗鑑劍弓矢法物羅列次序開
建門戶具有儀範其中曰延祚保生壇凡星位二千四

百為周天大醮法物儀範降上壇一等

案上三壇中壇各載壇名星位

醮名而下壇不載係原本脫略無別本可校姑仍其舊

倘非禱祀不及備此三壇

亦當精潔辭章鮮異花果扣鼓集神懇禱而告去地九尺焚香以奏亦可感應也中三壇則為臣僚設之其上曰黃籙延壽壇凡星位六百四十其中曰黃籙臻慶壇凡星位四百九十其下曰黃籙去邪壇凡星位三百六十此三壇所用法物儀範各有差降下三壇則為士庶設之其上曰續命壇凡星位二百四十其中曰集福壇

凡星位一百二十其下曰卻災壇凡星位八十一所用儀範量有等差此九壇之外別有應物壇或六十四位或四十九位或二十四位法物所須各以差降士民之類可量力而為之如臣庶上為帝王祈祐當作祈穀福時壇凡一千二百位或為父母師尊禳災祈福當為醮設壇隨宜增益也守真拜而受之自爾多有徵驗不能備記乾德中太宗皇帝方在晉邸頗聞靈應乃遣近侍齋信幣香燭就宮致醮使者齋戒焚香告曰晉王久欽

靈異敬備俸緡增修殿宇仍表乞勅賜宮名真君曰吾將來運值太平君宋朝第二主修上清太平宮建千二百座堂殿儼三界中星辰自有時日不可容易而言但為吾啓大王言此宮觀上天已定增建年月也今猶未可使者歸以聞太宗驚異而止太祖皇帝素聞之未甚信異名小黃門長嘯于側謂守真曰神人之言若此乎守真曰陛下倘謂臣妖言乞賜案驗戮臣于市勿以斯言褻瀆上聖須臾真君降言曰安得使小兒呼嘯以鄙

吾言斯為不可汝但說與官家言天上宮闕已成玉鏤
開晉王有仁心翌日太祖升遐太宗嗣位尋召守真作
延祚保生壇醮罷真君降言于內臣王繼恩曰吾有言
汝當為吾奏之曰建隆元年奉帝言乘龍下降衛人君
掃除妖孽猶閑事縱橫整頓立乾坤國祚已興長安泰
兆民樂業保天真八方効貢來稽首萬靈震伏自稱臣
親王祝壽焚香禱遞相虔潔向君親吾有捷疾一百萬
諸位靈官萬垓人若行忠孝吾加福若行悖逆必誅身

賞罰行之既平等天無紛穢地無塵愛民治國勝前代
萬年基業永長新繼恩錄之以聞太宗覽之驚異稽首
謝曰家國之幸宗廟之慶虔荷上聖賜此格言尋遣內
供奉官王守節起居舍人王龜從就終南山下築宮方
卜地于終南鎮真君忽降言于龜從曰此地乃修建上
帝宮闕之地不可易也于是乃定凡二年宮成宮中有
通明殿玉皇三十二天帝大遊小遊五福四太乙紫微
帝君并二十八宿七元殿黑殺殿并靈官童子六丁神

歲星辰星又有天蓬九曜東斗三官玄武十二元辰西斗天曹殿南斗閣靈官堂龍堂命常參官一人主宮事選道士焚修軍士百人守衛題曰上清太平宮一如真君豫言之制命常參官一人監宮擇道士焚修每歲三元及誕節皇帝本命日並遣中使致醮祀神之夕上望拜焉歲或水旱或國家將舉事率致禱焉初宮成真君忽降言謂王龜從等曰汝奉詔修宮勤則至矣然何為不開日月華門不畫八小殿壁堦墀甃甃亦未嚴備惟

求速成以冀恩寵然上天亦不掩爾功亦不赦汝罪守節龜從頗切驚懼然已奏訖役不及增惟稽首祈謝而去至闕皆獲增秩賜白金千兩既而守節染疾而亡龜從歿于兵刃太平興國初太宗皇帝親征太原真君忽降言于守真曰官家已臨汾晉非久克復城池汝當令監宮內臣等設醮以謝勝捷于上帝守真等曰國家大事乞俟捷音真君曰上天已定勝負也踰旬而王師告捷監宮等以聞帝遣內臣盧文壽齋內庫香藥御書詞

章詣宮陳醮以謝是夕真君降言曰官家設此大醮上帝與諸天皆喜國祚延遠過于有唐六年守真以乾明節詣闕朝賀召見因面奏曰聖真下降俯為昌朝乞降詔加號以答靈貺上允其奏尋下詔曰太平宮神受命上穹降靈下土苾芬致薦肸鬯有徵大庇斯民屢垂丕貺宜加美號以答神休其封神為翊聖將軍詔至宮守真焚香以告真君忽降言曰汝當上問官家所言翊聖者翊何聖守真數日疑懼不敢答復降言曰汝但馳奏

官家不罪汝守真遂具章以聞太宗覽之召近臣謂之曰玉帝輔臣所翊者上帝也當以此意報守真令啓白也既而內臣傳命到宮守真詣殿焚香以告真君曰此意是也七年守真復詣闕朝賀真君忽降言曰吾有言汝當聞于官家曰大道興陰謀滅諸天聖衆皆欣悅宋朝社稷甚延長太平景運初興發君上端心顯明哲愛民治國常須切萬年基業永長新金枝玉葉無休歇守真得之以聞詔賜紫衣號崇元大師至道初忽降言謂

守真曰吾建隆之初奉上帝命下降衛護宋朝社稷今
基業已成社稷方永承平之世將繼有明君吾已有期
却歸上天汝等不復聞吾言矣倘國家祈禱但嚴潔焚
香北面告吾雖不降言當授福衛護宗社大中祥符七
年詔曰誕敷寶命仰荷于至神昭報殊微虔增于懿號
蓋為邦之大典庇民之深旨也而況翊宣元化表式衆
靈司陰隲于含生播明威于福地當王基肇啓固降治
而已彰洎文考纘承復先期而斯應繇是亟營珍館備

薦徽章蒙介福于無垠佐鴻圖于累盛顧惟眇質紹撫
繇區屬典禮之交修實祺祥之沓委緬懷幽贊敢怠欽
崇是用益以丕稱奉之茂則式達至精之懇庶申祇答
之文期克萃于寅恭永保寧于品彙爰頌成命俯告宰
司深體予懷共宣其事翊聖將軍宜加聖號曰翊聖保
德真君守真又嘗啓真君曰道釋儒典並垂于世未審
崇奉何者即得獲其福真君曰太上道德經大無不包
小無不納修身鍊行治家治國世人若悟其旨歸達其

妙用造次于是信奉而行豈惟增福諒無所不至矣釋
氏之四十二章經制心治性去貪遠禍垂慈訓戒證以
善惡亦一貫于道矣奉之求福固亦無涯至于周公孔
子皆列僊品而五經六籍治世之法治民之術盡在此
矣世雖諷讀多不依從若口誦而心隨心隨而事應仁
義信行禮智之道常存于懷豈惟正其人事長生久視
之道亦何遠矣守真又嘗啓告曰華山陳搏近卒時人
謂之尸解未審其人修何功行證僊階乎真君曰搏之

鍊氣養神頗得其要然及物之功未至但有所主掌耳
端拱中知鳳翔府高凝祐嘗詣宮致禮即去真君忽降
言于監宮李鑄曰高凝祐行虧忠信死非久矣秩滿還
京為三司判官數月而卒自真君臨降官市民庶不遠
千里祈禱乞聞誨言大抵多隨其性習加以訓勗人臣
依于忠人子依于孝清淳者示之格言貪酷者警以要
道詞甚平易頗叶音韻開寶中侍御史路沖乞賜真語
真君曰盡力事君以為忠臣濁財勿顧邪事莫聞整雪

刑獄救療人民動合王道終為吉人積愆為咎必有沈
淪衆生本無形之性配有形之軀曠劫以來不能自悟
自有無極世界不夜之鄉混合太虛杳冥同理又曰六
合乾坤內衆生多不會造孽向前行如盲鶩江海如將
智慧觀自越千里海沖再拜錄而誦之左補闕王龜從
焚香懇禱曰如何修身得獲遐壽真君曰勸汝修鍊莫
如精勤精勤不怠上聖皆聞太平降世用武興文無文
則不正用文則益君食祿則不違王命行吉善但守清

貧清貧者響合天地濁富者像火投冰投冰者火緣漸
滅積惡者自貫其身自貫者殃及七祖地府下痛害及
親吾懸千尺之索提釣有緣之人道之尊德之貴大道
能生一切物衆生頭像天足像地中心空然合真理鑿
戶牖以為室房室之中有一物亦無影亦無形杳杳冥
冥人不識若能識者得長生陽在天陰在地二氣同和
誠有謂空中造化乃自然自然之中生萬類天不高地
不卑大道混合虛無理學道衆生審欲聞此是修行崇

妙門丞相沈倫嘗連綿臥疾遣使致告曰如何修行得免茲患真君曰靈物不病形軀自安形軀有病返照而看倫驚喜曰吾得之矣後數日疾遂愈王德淵因遊終南山寓止其宮中勤奉香火好養生而性褊多所恚怒忽一日真君降言謂之曰汝學道修真先當調習其性以順天和忘諸有為勿耗心識融怡凝湛道乃可見復見之日莫管內莫管外來往真靈無罣礙所居安樂是汝家各自勤行莫相待先達之人難滯礙真空妙藥有

天堂與聖相同滅諸罪德淵曰上感真君降言教示不
曉前篇內與聖相同滅諸罪願垂誨諭真君曰汝若除
煩入靜鍊心修真積累其功數盈之後泥丸百節之神
靈通而自同于聖天堂妙藥無所不至豈更有諸罪也
故言與聖相同滅諸罪太平興國中駕部員外郎李鑄
嘗知鳳翔府備觀靈應俄復奉詔監宮凡十餘年志頗
嚴潔真君前後降語僅十餘篇其有錄者數首一曰建
隆之初方稟希夷上帝命吾衆聖皆知乘龍下降列宿

相隨五岳受命主張地祇潛扶社稷密佐明時吾要李
鑄知吾降期不得輕洩免漏天機又曰與吾盡忠理國
與吾以道理民與吾慈善理家與吾不飲自醉醒時理
民醉時理神此語是延年益壽之法吾勸府主記取又
曰為官求理在貞明智慧俱通臨事清觀天行道合陰
德食君爵祿常若驚為吾洗心復換骨背凡入聖奔長
生天宮快樂勝凡世不夜之鄉挂一名又曰府主累世
為人降生中國與吾清直莫行邪曲與吾積善累功與

吾佐輔明主與吾洗雪黎民與吾挂心刑獄上帝若知
名天官也剋取捨住世輸流之財但修取有形之像獲
隨身之功德無量之福與吾不得因循不奈時光迅速
靈官賞汝功勲天曹與汝添福若一一依吾聖言必得
延年益壽又曰年登七十餘住世不久居饒君壽百歲
問汝得幾秋地府直湏怕冥司難請求有功無驚懼積
罪必遭誅子孫難替代早覺莫癡愚淳化中西京留守
中書令趙普嘗遣使備禮致醮虔祈願聞休咎真君降

言曰趙普扶持社稷甚有功勳上天所知賜汝福壽以
大妨小幽府亦有寬對當啓誦真經告祈天地首懺前
非吾亦與汝達于上帝庶解茲咎汝官職壽數已有限
矣其使錄之而去普跪讀感涕因焚詞謝過遣人詣宮
設醮殿中丞張卓嘗乞聖言真君曰大道養汝性陰陽
生汝身為吾勤行道為吾勤修真公廉當用意憂恤在
乎民遇時佐明主清濁上帝聞濁富終不久清貧為天
人莫教人道富從他人笑貧自有真家福清高不愧貧

又曰形凡性不凡為國顯清廉家積千餘口有罪自家
擔真君又嘗戒官吏等曰每存忠信齊其天文武班行
自有賢為主萬年安基業常憂黎庶恐饑寒長行德行
合其道燒香虔祝告虛玄但願國安君長久齊心輔佐
太平年凡真君所降語帝命宰相王欽若編次之為三
卷藏于秘閣仍賜本宮

真宗咸平間知揚州魏羽上霄祀五龍祈雨法詔頒諸
路其法以甲乙日擇東地作壇取土造青龍土器之大

小龍之修短餘方皆如之凡旱建壇取五行生成之數
馬長吏齋三日詣龍所汲流水設香茗果率官屬日再
至祝酹不用樂巫覡雨足送龍水中

擇潭洞或湫澗林木深邃之所以庚辛壬癸日先齋戒
以酒脯告社令築方壇三級高一尺闊一丈三尺壇外
二十步界以白繩壇上植竹杖張畫龍其圖以縑素畫
黑魚左顧環以天黿十星中為白雲龍黑色其下畫水
波有龜亦左顧吐黑氣如線和金銀朱丹飾龍形又設

阜幡刎鵝頸取血致盤中楊枝灑水龍上羣官再至祝
酌雨足取龍投水中

神宗建中太一宮衣冠之制 熙寧五年建中太一宮
內侍主塑像乃請下禮院議中太一衣冠禮院乃具狀
請如東西二宮之制太一盡服通天絳紗有言亳州太
清宮有太一塑像上遣中使視之乃盡服王者衣冠遂
詔如亳州之制

延祥觀紹興十四年建以奉四聖真君初靖康末上自

康邸北使將就馬小婢招兒見四金甲人各執弓劍以
衛上指示衆皆云不見憲仁后聞之曰我事四聖香火
甚謹必其陰助及陷北庭每夕夜深必四十拜及曹勛
南歸后令奏上宜加崇奉以答景貺云觀今在西湖上
極壯麗其像以沈香斲之修繕之費皆出慈寧宮有司
不預

太宗曰古者一夫耕三人食尚有受其饒者今殆二十
人矣東南之俗連村跨邑去為僧者蓋慵稼穡而避徭

役耳泉州奏未剃僧尼繫籍者四千餘人其已剃者數

萬人尤可驚駭

案此條見江少虞事實類苑採錄補入

太平興國中始置譯經院于太平興國寺延梵僧翻譯

新經始以光祿卿湯公悅

案李燾長編太平興國七年建譯經院詔天竺國僧天息

災等各譯一經以獻以光祿卿湯悅兵部員外郎張洎潤色之湯悅原本誤作陽悅今改正

兵部員

外郎張公洎潤色之後趙文定楊文公晁文元李尚書

維皆為譯經潤文官天禧中宰相丁晉公始為使天聖

三年又以宰相王冀公為使自後元宰繼領之然降麻

不入銜又以參政樞密為潤文其事寔重每歲誕節必
進新經前兩月二府皆集以觀翻譯謂之開堂前一月
譯經使潤文官又集以進新經謂之閉堂慶曆三年呂
許公罷相以司徒為譯經潤文使明年致仕章郇公代
之自後乃降麻入銜

國家兩京諸州僧尼共六萬七千四百三人歲度千人
自後削平諸國其籍彌廣

祖宗憫五代之亂民墜塗炭常布恩旨錫福天下太平

興國七年九月詔曰朕方隆教法用福邦家念天下之
度人拘有司之制度俾申素願式表殊恩應內外繫籍
童行長髮並特與剃度

景德三年詔曰老氏立言實宗于衆妙能仁垂教蓋誘
夫羣迷用廣化樞式資善利兩京諸州道釋歲度十人
者特放一人不取經業祥符二年正月以封禪行慶詔
天下宮觀寺院內十人度一人不滿十人者亦度一人
三年天慶節兩京諸路宮觀每十人度一人不及十人

者亦如之天禧三年八月詔普度天下道士女冠僧尼
凡度二十六萬二千九百四十八人天禧末天下僧三

十九萬七千六百一十五人尼六萬一千二百三十九

人

案錦繡萬花谷引此書云天禧三年普度僧道凡六
十六萬二千四百九十人與此數不符又考文昌雜

錄元豐間祠部歲比天下僧尼道士凡二十四萬然死
者亦常萬人據此書所載真宗天禧時僧尼已至四十
五萬八千八百餘人道士更不在此數況至神宗
元豐時耶龐元英殆據當時案牘之文未足信也天聖

三年判都省馬亮上言天下僧以數十萬計間或為盜

而民頗患之請除每歲合度人外非時更不度人仍自

今無得收曾犯刑及文身者詔並從之

禮部勘當今欲將本部例冊內僧尼等師號頒降諸路
州軍等處照會委所屬官司許于數內選擇書填者奉
聖旨依下項

僧師號

法乘 法真 法照 慧滿 慧空 慧海 真悟

真懿 真戒 妙空 文慧 普明 慈懿 慈濟

真教 明普 宣秘 慧照 禪鑒 淨因 淨慧

淨嚴 淨悟 普證 圓證 證悟 慈覺 慧覺
密印 崇辨 通照

尼師號

妙清 妙明 妙滿 妙果 了慧 了因 了行
了緣 了真 真懿 真行 真淨 真戒 真範
慈懿 慈媧 慈悟 慈願 慈滿 慈範 慈因
慧秀 淨信 圓照 妙因 崇智 真寂 勝因
靖智 登寂 妙智 真果 寶勝

道士師號

真觀

沖真

沖清

沖隱

道清

道空

道安

道成

虛希

虛安

虛遠

虛妙

虛辨

虛一

虛濟

虛應

沖寂

元觀

元正

明一

明素

靈一

明微

洞元

淵宗

沖素

沖寂

崇道

演道

明素

靈寶

虛寂

保寧

洞淵

女冠師號

真寂

真靜

真懿

真妙

守一

守白

守真

安素 安教 安常 希妙 希密 希真 虛範

凝範 棲雲 棲月 靈素 靈懿 沖秀 沖和

通妙 澄妙 淵智 淵妙 通微 希無 真淨

宣淨 宗微 澄秀 宣真 沖懿 凝真 元素

沖真 靈寂

宋朝事實卷七

欽定四庫全書

宋朝事實卷八

宋 李攸 撰

玉牒

宋有天下百餘年所與分天工共民事者皆取之疎遠側微不私其親故宗室之賢未有以勲名聞者神宗皇帝實始慨然欲出其英材與天下共之增立教養選舉之法所以封植琢磨之者甚備行之二十年而文武之

器彬彬稍見焉

上嘗語及宗室多求外居者宰相韓琦曰臣請許親盡
無服者外居然後因之試以外官上曰宗子素未諳民
政若補外官但慮易致過失爾琦曰陛下若命宗室習
律令久之何患其不能從政也參知政事趙槩曰人臣
子弟未必皆有過人之才使之從政尚能粗了局事蓋
積習使然宗室固多美才若擇而任之庶幾漸知為政
之方也上曰五七年漸當以外官試之

案此條但稱上
語宰相云云不

指為何代攷宋史韓琦于仁宗嘉祐三年六月拜同平章事趙鼎于嘉祐七年三月除參知政事是時琦與鼎並為宰執此當為仁宗嘉祐七年以後事也

富弼議裁損宗室授官 英宗問輔臣前代宗室樞密使富弼對曰唐之名臣多出宗室樞密副使吳奎曰祖宗時宗室皆近親然初授止于殿直侍禁供奉官不如今之過也朝廷必為無窮計當有所裁損上然之

徽宗朝增神宗教養選舉法 尚書右僕射蔡京等言伏攷宗室在祖宗朝制祿蓋寡至仁宗時始除南班官

自率府副率凡五六遷遂至正任承平日久皇支寢繁
神宗皇帝乃下詔書別其親疎異其等殺遂斷自祖宗
袒免親罷補環衛之官盡除班行名目袒免以外更不
賜名授官止許應舉自熙寧至今宗室人無官者已一
千五百餘人宗女之未嫁者亦千五百有奇皆宣祖太
祖之裔或有貧困失所者臣等伏攷神宗詔書蓋為袒
免既已賜名授官若願應舉者自當依進士法其非袒
免既不賜名授官故止令量試藝業即推恩數非若應

進士舉之難也至于年長累試不中則又有特與推恩
量材錄用之制則隨其材器收錄盡矣至于世數稍遠
及貧無依者則又賜田存恤有差逮元祐紛更廢量試
之法改依進士科舉之制是以自熙寧至元符初三十
餘年中科舉者才二十餘人既廢量試之法亦未嘗有
以年長推恩者賜田之令徒為虛文雖有量給錢米之
法未能周濟其乏遂致宗室不能自給臣等謹追攷神
宗詔書推原本旨稽之往者增以當今所可行者謹條

具如右一非袒免親乃祖宗六世孫伏請將上件服屬宗室二十五以上者今次許于禮部投狀試經義或律義一道以文理稍通者為合格分為兩等候至來春附進士榜推恩內文藝優長者臨時取旨其不能試或試不中者並赴禮部書家狀讀律列作一項奏名今來止為前此未曾推廣補攷量試推恩之令致使宗室無官者遂衆有此陳請只作一時指揮不為永法今後自依熙寧詔書賜田並於兩京近輔沿流州軍取應未賣官

田物業撥充每州府各置宗室官莊專差文武官各一員與逐州通判同行管幹逐縣兼管仍置指揮使二員每歲量入為出宗女量給嫁資仍立定則例量支嫁娶喪葬之費其逐州自今後有沒官田產物業更不出賣並撥入官莊仍先于京西北路撥田一萬頃一熙寧詔書袒免以下許隨處置產業其出官即置田宅一如外官之法蓋以宗支寔廣其疎屬理當聽其外居勘會宗室舊來在宮有出入之限有不許外交之禁宮門有譏

察之令今疎屬外居僅遍都下出入無禁交遊不節往往冒犯法禁伏請非袒免親以下兩世欲分于西京南京近輔或沿流便近居止各隨州郡大小創置屋宇仍先自西京為始每處置敦宗院差文臣一員武臣一員管幹參酌在京院法禁可施行者頒下應無父母兄弟見任將軍副使以上官者許令前去若有父母兄弟而願去或無而不願者聽從便依外官赴任立法量給舟船接人一乞依神宗詔書不拘世數應宗子宗女尤貧

失所者伏請委所在州郡報明量加存恤訖奏一乞于
兩京置外宗正司官掌業所在宗室擇宗室之賢者管
勾外宗正事仍自朝廷于本州通判職官內選差二人
兼領丞簿以主其事一乞隨所在諸宮置學添教授立
法教養量試宗室依熙寧文武官試出官法策試經義
中選者許令出官若再試不中者止許在宮院使食其
祿一神考釐正宗室袒免非袒免各立奏補子孫之法
獨總麻親舊用國蔭自來未有蔭孫以下明文伏請依

外官例得補蔭孫一舊制宗室袒免親參選常許不拘
名次陳乞指名差遣非袒免親初選依條添差外更不
拘名次陳乞指名差遣一次以後每到部與陞一年名
次陳乞今後宗室非袒免以下親量試出官者並各于
員闕外添差每大郡通屬縣不得過十人中郡不得過
七人小郡不得過四人候到任不簽書本職公事如有
本轄長貳或監司二人保奏堪任釐務方得供職未釐
務者添支驛券供給人從從之

宗室賜名授官 孝字親王之子授武衛將軍其餘宗

室不用此例○祖宗總麻親賜名○承字男賜名克字

○宗字男賜名仲字○從字男賜名世字○授官太子

右內率府副率○祖宗袒免親賜名○克字男賜名叔

字○仲字男賜名士字○世字男賜名令字○授官右

班殿直○祖宗非袒免親不賜

原註熙寧二年以前叔字男賜名之字士字男

賜名不字令字
男賜名字字

奏薦

原註熙寧二年以前授太子右內率府副率

以上承字

宗字磨勘至使相止從字仲字世字至觀察使止叔字

士字令字授副率者至遙郡防禦使止之字不字子字

賜名授官者至遙郡刺史止

襲封

原註國朝舊制諸王之後用本宮最長一人封公繼襲熙寧二年十一月敕祖宗之子皆擇其後一

人為宗令世世封公補環衛之官以奉祭祀不以服屬盡故殺其恩禮案宋史秦王廷美傳熙寧二年詔宣祖太祖太宗之後擇一人封公世襲無補環衛官之句而神宗本紀是年十一月甲戌詔祖宗之後世襲補外官與此環衛之官亦異存此條攷

祖宗之子並傳嫡襲封

原註熙寧二年閏十

一月五日聖旨祖宗之子並令傳嫡襲封案宋史秦王廷美傳熙寧三年以太常禮院言令祖宗之子傳嫡襲封神宗本紀亦作三年七月詳定宗室襲封制度此書作二年與宋史互異

濮安懿王諸子

案熙寧十年十月詔濮王子以次襲封奉祀此條濮安懿王諸子句下有闕文並脫去小註

宗室轉官資級圖

原註并料錢

節度使兼侍中

案宋史宗室敘遷之

制由節度使同中書門下平章事轉節度使兼侍中節度使同中書門下平章事即使相也原本使字上脫節度二字侍中字上脫兼字今從宋史補正○使相○左衛上將軍○右衛上

將軍節度使

○三級

原註四百貫

○節度觀察留後

案宋制節度觀

察留後月俸三百貫觀察使防禦使並二百貫此書誤以觀察留後為留後觀察而于防禦使之上脫觀察使三字將觀察留後及觀察使二職混而為一今從宋史改正

二級

原註三百貫

○觀察使

○防禦使○一級

原註二百貫

○團練使

○遙郡防禦使○

一級原註一百五十貫○刺史○遙郡團練使○一級原註一百貫

○遙郡刺史

案自此遙郡刺史以下至衛將軍月俸若干貫各有不同攷宋史職官志皇親任諸

衛大將軍領刺史八千將軍領刺史六千將軍三千率府率二千副率十五千蓋宗室俸祿之制與敎遵之制不同故諸衛大將軍本六千兼領刺史則增為八千將軍本三千兼領刺史則增為六千矣此書俱闕一級○左右衛大將軍○左右金吾衛大

註附識脩攷將軍○左右龍武軍大將軍○左右羽林軍大將軍○

左右神武軍大將軍○左右驍衛大將軍○左右武衛

大將軍○左右屯田衛大將軍○左右領軍衛大將軍

○左右監門衛大將軍○左右千牛衛大將軍○一級
○左右衛將軍○左右金吾衛將軍○左右龍武衛將
軍○左右羽林軍將軍○左右神武軍將軍○左右驍
衛將軍○左右監門衛將軍○左右千牛衛將軍○左
右領軍衛將軍○一級○太子左右衛率府率○太子
左右司禦率府率○太子左右清道率府率○太子左
右監門率府副率○太子左右內率府副率○一級

原註

十五
貫

宗室換官

案宋制有文臣換右職武臣換文資俱見宋史職官志至宗室換官之制則略而不書此

足補

諸衛將軍

原註就文官者換太常率府率
其闕 丞就武官者換率府率
原註就文官者換大理

其闕

官者換太子中允就武官者換內殿崇班

率府副率

原註就武官者換西頭

俸俸

左右班殿直

原註換試

三班奉職借職

原註無

上須袒免親將軍以下方許換出外官其大將軍以上

願換外官者並臨時取旨

宗室轉官資級

太子右內率府副率

原註轉太子右

太子右監門率府率

原註轉右千

右千牛衛將軍

原註

監門衛大將軍 案宋史職官志千牛衛將軍當轉右
監門衛大將軍 右監門衛大將軍轉送郎刺史原本右

千牛衛將軍 下脫小註轉右監門衛大將軍并
大字右監門衛大將軍 十五字今從宋史增入 **右監門**

衛大將軍

原註轉送郎刺史 **送郎刺史** 原註轉送郎團練使

即轉正 **遙郎團練使** 原註轉送郎防禦使 諸王後見封國公特旨

轉送郎防禦使原本誤作團 **刺史** 原註轉團練使 **團練使** 原註

練使今從宋史職官志攷正 **團練使** 原註轉防
案宋制宗室敘遷之制團練使轉防禦使原 **防**

禦使

原註轉觀察使 **觀察使** 原註轉節度 **節度觀察留後** 原註

度使特旨轉左 **左右衛上將軍節度使** 原註轉節度使

章節度使同中書門下平章事

原註轉節度使兼侍中

宣祖五子

太祖皇帝○太宗皇帝○邕王光濟○秦王廷美

原註本名

光美○夔王光贊

案光濟早亡宋初追封邕王徽宗時改封曹王廷美太宗初封秦王進封秦王

太平興國七年降涪縣公九年追封涪王真宗復秦王徽宗改封魏王光贊幼亡宋初追封夔王徽宗改封岐王攷東都事略及宋文皆書其最後徽宗時封國故光濟稱曹王廷美稱魏王光贊稱岐王而此書則書太祖時封國為號體例與各書不同

太祖四子

楚王德秀○燕王德昭○舒王德林○秦王德芳

原註太宗

嘗謂宰相曰德昭德芳先帝之子朕篤愛之猶子也不欲異其稱呼當令有司與昭慶公主而下依舊稱皇子
案東都事略德秀早亡徽宗追賜名封滕王德昭初封武功郡王太平興國四年追封魏王英宗改封越王徽宗改封吳王德芳太宗追封岐王楚王徽宗改封秦王宋史並同攷德秀未嘗封楚王德昭未嘗封燕王于德芳則又書其最後封國為號與本書體例復不合疑有訛誤

太宗九子

楚王元佐○真宗皇帝

案東都事略及宋史太宗九子長漢王次昭成太子次真宗今

此書列真宗于昭成太子之前與各書互異

○昭成太子元僖○陳王元份

○安王元傑○密王元偓○曹王元偁○涇王元儼○

代國公元億

案宋史元佐原名德崇初封衛王進封楚王改名雍熙二年廢為庶人真宗即位

復楚王進封齊王潞王英宗封魏王徽宗改封漢王昭成太子初名德明封廣平郡王進封陳王改名元佑後改今名進許王進贈太子諡恭孝改諡昭成元份初名德顛改名元俊封冀王又改今名封趙王真宗改雍王進封陳王潤王英宗改魯王徽宗改封商王元傑初名德保後改今名封益王真宗封兗王進封安王邢王英宗改封陳王徽宗封越王元偁初封徐國公真宗封彭城郡王進寧王徐王進封鄧王密王英宗封韓王徽宗封鎮王元偁初封安定郡王進舒王進封曹王華王英宗封蔡王徽宗封楚王元儼初封曹國公真宗封廣陵郡王進封榮王尋降端王改彭王通王涇王仁宗封定王荆王進封燕王英宗封吳王徽宗改封周王元億早

己追賜名封代國公英宗封安定郡王徽宗改封崇王
此書于太宗諸子皆書其始沒時追贈封國為號而于
元偃不書鄧王而書密王于元偃不
書燕王而書涇王則又自亂其例矣

仁宗四子

襄王昉○豫王昕○鄂王曦○英宗皇帝

案太宗諸子以後應繼以

真宗諸子永樂大典原本附玉牒于祖宗世次之後自
真宗及英宗以下世次既闕而諸子玉牒亦復不詳

公主

秦國長公主嘗為子莊宅使世隆求正刺史

案宋史秦國長公主

即太祖女昭慶公主太宗改封秦國真宗時進長公主
下嫁王承衍子世隆為如京副使厯洛苑六宅二使不

言其為莊宅使此足補宋史之闕

真宗曰正刺史係朝廷公議不可魯

國長公主

案宋史魯國長公主即太祖女延慶公主至元符初進封魯國

為翰林醫官

使趙自化求尚食使兼醫官院事上謂王繼英曰雍王

元份亦為自化求遙郡朕以遙郡非醫官所領此固不

可也駙馬都尉石保吉自求見上言僕夫盜財乞特加

重罪上曰有司自有常法豈肯以卿故亂天下法也又

請于私第決罰亦不許

案此條見江少虞事實類苑今採錄補入

胡宿上仁宗論克國公主議行冊禮劄子 今月二十

一日草福康公主特進充國公主制竊聞議行冊禮然
于事體頗有未便祖宗以來公主長公主未有行此禮
者昔漢明帝封皇子悉半諸國明德馬皇后曰諸子食
數縣不已儉乎帝曰我子豈敢與先帝子等也唐貞觀
中太宗長樂公主將出降帝令有司資送倍于永樂公
主魏徵曰不可引漢明帝之言為對且曰天子姊妹稱
長公主加長字是有所尊崇或可情有淺深無容禮相
踰越太宗然其言入告長孫皇后后遣使賜徵金帛陸

下即位以來累曾進封楚國魏國二大長公主亦不曾
行冊禮今施于究國公主是與大長公主相踰越兼以
貴主之故賢妃亦蒙殊典有旨令進諭告不行冊禮是
母子之間一行一不行禮意尤不相稱書于史冊後世
將有譏議必謂陛下偏于近情虧聖德之美臣願陛下
采漢明之言開文皇之聽遵祖宗舊典如國朝公主曾
行此禮行之粗且無嫌如其不曾則宜且罷臣以陛下
好忠諫納至言臣職在論思不敢不言

除皇女福康公主進封充國公主制

案宋史福康公主
仁宗長女嘉祐二

年進封
充國

門下天道之美濟下而光明王化之行由中而

洽被唐堯有釐降之典召南載肅雍之詩範俗崇風于
是乎在國家慶靈憑厚德教深長迪厥真源育茲懿主
儀我皇室繫于舅門待年及于有行涓日申于誕告皇
女福康公主閑和居德秀映棲神聰悟之姿非由于外
獎徽柔之性乃蹈于自然朕懷先后之慈篤外家之愛
將敦美化是選密親教著沁園導人倫之婦順恩加渭

水廣天下之孝思是用詳按舊章稽合嘉禮爰築其館載肅之車卜以仲秋社茲元吉向班初冊嘗擇美名未拓膏腴尚闕湯沐進開曲阜之國行食龜陰之田儀服有光號名增重於戲貴宜思降富勿期驕尚懷國史之言緬念衿禱之戒往服休寵永綏壽昌

韋驥代陳少卿賀福康公主進封充國表中宸有命美化務先于族親貴主進封優恩不奪于典禮風聲遐被中外交忻臣誠歡誠喜頓首頓首恭惟尊號皇帝陛下

配天地之德紹祖宗之基守無逸于持盈槩至公于立
極御遠以近齊邦以家治宮等周官之規訓女偕堯舜
之法罔愧前躅克成令猷公主分乾之英體巽之順雖

曰愛之欲其富不以生而榮

案愛之欲其富以下疑有
脫誤無別本可校姑仍其

舊豈湯沐不可一而充印綬不可一而足蓋誨育之存

節故寵私之有階龍光一宣慈孝兩得教其有素下嫁
豈忘其矩度澤非不隆四方孰謂之偏黨朝野歡浹人
神氣和邁治古之休光增太平之盛事臣限以官守不

獲奔走闕庭稱慶無任瞻天踴躍之至

德寧公主將出降上謂輔臣曰公主第及房從之物比
福康公主皆減三之一又對羣臣數稱唐公主多適名
人而近世士人乃畏尚主命擇士人得尚書職方員外
郎王克臣之子孝莊者故駙馬都尉承衍曾孫而父子
皆業進士今至宰相第試以詩而并其所業一編以進
上召見清居殿拜左衛將軍駙馬都尉賜名師約又命
以母廢學後又出經籍及紙筆墨賜之

案德寧公主英
宗長女進封徐

國宋史載王師約字居授英宗命宰相諭旨令師約持
所為文至第明日獻賦一篇即坐中賦天人繼命詩遂
賜對選尚公主而賜玉帶及九涇筆硯勉之進學與此
書所載詳略不同史亦不載其本名孝莊賜名師約據
此可補宋
史之闕

宣祖女

陳國長公主

案宋史太祖有姊一人未筭而天建隆三年
迺封陳國長公主又案太祖同母妹初

適米福德建隆三年封燕國長公主再適高懷德元符
三年改封秦國宋史但為秦國立傳而附陳國子傳未
以其早天未及下降也洙水紀聞太祖將北征京師宣
言出軍之日當立點檢為天子太祖懼密以告家人太
祖姊面如鐵色方在厨引麪杖逐太祖擊之曰丈夫臨
大事可否當自決曾懷乃來家問恐怖婦女何為耶太

祖默然而出或云即魏國長公主攷魏國長公主太祖
女即昭慶公主非太祖姊也據史云太祖姊早夭則引
麴杖逐太祖者當為太祖妹秦國長公主可知沫水紀
聞屬傳聞之誤而此書于宣祖女止載陳國長公主不
載秦國長公主意陳國必秦國之誤蓋此書于公主早
亡及未下嫁者俱削而不書如太祖六女申國成國永
國三公主早亡不載止載秦國晉國許國三公主太宗
七女滕國早亡邠國為尼沒後始有封號故不載其體
例與宋
文互異

太祖女

秦國大長公主○晉國大長公主○許國大長公主

太宗女

燕國長公主○曹國長公主○晉國大長公主○鄭國

長公主○申國大長公主

案太宗女以下應繼以真宗以下公主永樂大典原本俱

失載

宋朝事實卷八

欽定四庫全書

宋朝事實卷九

宋 李攸 撰

官職

乾德四年詔御史臺吏部流內銓南曹刑部大理寺自
少卿郎中員外郎知雜侍御史以下及丞簿司直評事
等並以三周年為滿須常在本司莅事者至日限滿即

與轉官

案此與下二條俱見江少虞事實類苑今採錄
補入攷李燾長編乾德四年八月壬寅詔以憲

府繩奸天官選吏秋曹獄獄俱為難才理宜優異故詔御史臺吏部刑部大理寺等官並莅事滿三歲者即遷其秩此書剛去上數語于詔意未能明晰

詔京朝官將命出入及受代歸闕者宜令中書舍人郭贄膳部知雜事滕中正戶部郎中雷德驥同攷校勞績及銓量材器候有闕中書類能以授之先是常參官自一品以下皆謂之京官未常參官謂之未常參官近代以常參官為朝官未常參官為京官故有朝官之目淳化五年十一月詔吏部選人赴調並須于京朝官內

求一人為職目用府縣諸司監印

太平興國之初朝臣班簿才二百人至咸平初四百人

天聖元年乃踰千人

原註李淑疏

真宗初即位以工部侍郎郭贄知天雄軍贄自陳戀闕下不肯去真宗曰全魏重地委任于卿亦非輕也宜去贄退召輔臣問之輔臣對以近例亦有已受命而復留者曰朕初嗣位命贄知大藩而不行則何以使人卒遣之

羣臣皆畏服

案此與下一條據江少虞事實類苑補入

諫官陳升之言比來館閣選任益輕非所以聚天下賢才張弛成就之意請約今在職者之數著為定員有論薦者中書籍其名若有闕即取其文學行義傑然為衆所推者取旨召試詔從之

景祐四年三月詔自今尚書省議事應帶職官三司副使以上並不赴如集議大事詔特赴者即別設坐初明道中殿中侍御史段少連言國家每有大事必集議于尚書省而本省官自三司副使已帶職者多移牒不赴

請凡託故不集者以違制論既而太常博士集賢校理
兼宗正丞趙良規言都省集官議謚用段少連請應本
省官帶學士知制誥待制臣謹按國朝故事及令敕儀
制別有學士知制誥待制三司副使著位視品即與前
朝制度不同固無在朝敘職入省敘官之理今若全不
論職假有中後行郎中兼學士

案中後行郎中兼學士
長編作員外郎兼學士

與此
小異

在朝立丞郎以上入省綴駕庫之次知制誥待制

入朝與六行侍郎同行入省即位郎官之下又如員外

郎任三司副使郎中為判官者在三司為參佐入省却位其上所以舊來議事除別詔三省悉集則中書舍人知制誥與常侍給諫至左右正言皆赴若內朝官悉集則學士待制三司副使皆赴若更集他官則諸司三品武臣三品各在本司長官之次若止是集尚書省官其帶職者並合不赴按閣門儀制大宴學士坐殿上與僕射同行知制誥與尚書丞郎同行若曲宴則三司副使在知制誥之後重行異位豈有親奉至尊于殿上其禮

如此暫入都省而卻降損著位又按故事尚書省官帶知制誥者並中書奏班簿即是于尚書省御史臺並不著籍故有絕曹之語又國朝以來凡定學士舍人兩省以上著位除先後入外若有升降皆是特奉朝旨豈有在朝入省迭為高下又郎中員外兼侍御史及任裏行者皆稱臺官不赴都省集議臣以為本省官兼佐臺職即是與帶知制誥待制等事體無異又按唐翰林學士有不知制誥者只是與今直館事體相類若國朝學士

知制誥待制則顯有著位與唐不同其侍讀侍講龍圖閣樞密等學士及三司副使即是國朝新制唐朝三司自是尚書之職自後別置使額而與今不同請自今除集三省官議事即如舊外若是本省議事其學士知制誥待制三司副使更不赴議詔御史臺與太常禮院詳定以聞禮院言按唐李肇翰林志凡學士無定員皆兼它官下自校書郎至諸曹尚書皆得為之既入院與班行絕跡亦不繫常參類守官三歲則遷知制誥五代職

官志翰林學士入院並先後為定惟承旨一員出自上
意不計官資先後在學士之上國朝儀制令敕翰林學
士侍讀侍講學士龍圖閣學士樞密直學士龍圖閣直
學士並在丞郎之上龍圖閣待制及知制誥三司副使
在少卿監之上自唐至國朝翰林學士知制誥待制三
司副使與本官絕曹不屬南省官之例載詳會議之文
由來非一或出朝廷別旨或循官司舊規故言集本省
即南省官也集學士兩省臺官者容有內制給舍中丞

之屬集學士臺省及諸司四品以上者容有鄉監之屬
集文武百官者容有諸衛之屬故謀事有大小集官有
等降率繫詔文昨因段少連以覆謚小事謂葦牧普會
議列為具奏嬰以嚴科遂使絕曹清列還入本行而良
規援求故實理當難奪請自今有臣僚擬謚者止令集
南省官屬或緣事體大臨事勅判兼召三省臺寺即並
依國朝舊例施行御史臺別奏云良規稱尚書省官任
外制者不著臺省之籍故有絕曹之語而以為重則今

尚書省官任內制者並係臺省之籍寧有坐曹之實而可輕乎然則論職官之言正為絕曹者設豈有受祿則繫官定俸議事則絕曹為辭況王旦王化基趙安仁晁迥杜鎬楊億皆時之重望嘗集議于尚書省而無變古之論故相李昉為主客郎中知制誥日屢經都省議事與散騎常侍徐鉉言見江南舊儒所說議事次第與此略同又議大事僕射御史大夫入省惟僕射至廳下馬于今行之蓋所以重本省也故都堂會議列狀以品就

坐以官忽此更張恐非通理請自今但係本省官帶職
令赴議而輒不集者如議國家典禮即從違制諭施行
若議常事止依律文處分又秘書省著作郎直集賢院
同知太常禮院吳育言若從本省敘官之議有不可者
二且自朝廷至臺省以及郡縣上下有次輕重有倫至
上莫若君父之前至重莫若朝廷之內上可以統下重
可以臨輕舉重則不可以輕者干舉上則不可以下者
撓夫尚書省雖制度尊大亦天子之有司官繫其中謂

之本省本省相會須有朝廷豈有君父之前朝廷之內
列班殊隔一入有司輒易尊卑而云在朝敘職入省敘
官以一體為二家以朝省為彼我上下異貫輕重不倫
此其不可一也官職之名本非二體官主其號職供其
職名實相繫豈有殊途只如庖人是官供庖是職祝人
是官致祝是職以何隔絕分官職為兩事蓋自唐室以
來臨事雜置遂有別帶職事之名厥後因循未歸本務
即今而言須以隸名為輕供職為重倘云入朝敘職入

省敎官則是官職相離遂為限絕推之于古蓋紊源流此其不可二也若從絕班不赴之議有不可者三古者尚書為天下綱轄喉舌之地故其官皆材識之士凡國有謀議取決其中今則不然惟以敎遷而其間拔擢英異又多歸侍從之中若絕班不赴則朝事諮決未盡其人此不可一也知制誥稱中書省奏班簿是謂絕班可以不赴本省如翰林學士亦知制誥而不絕班簿此皆因循之制參差不倫未可取為確據縱絕班有例而絕

曹無聞謹按唐六典中書舍人以他官兼者謂之兼制
誥故白居易草楊嗣復授庫部郎中知制誥辭云前代
制誥中書令侍郎舍人通掌之國朝以來或以它官兼
領又授元稹中書省舍人辭云元稹自祠曹員外試知
制誥謂之兼則宣絕本官謂之試則明未正職斯皆章
灼不疑之事也今縱有明文絕其官若遇定事猶當以
事體追而正之況無明文但引因循參差之事為據此
不可二也今兩制遷改其告身命辭必舉本曹之務為

之訓諭凡受一敕牒則下至府寺冗局猶供其職豈有
一人命書三省連判而都無所繫若止為俸錢徒加官
號命官之理豈若是乎惟兩府大臣不可更親有司之
事況其俸祿亦不繫其官自餘縉紳遷次所主者官名
俸給盡從本省居常既不復至會議又不一來則是自
絕其官矣仲尼不去籩羊粗存告朔之禮若并羊亦去
寄禮無地則一省之制自此盡隳縱以班絕皆可不起
若有詔兩制臺省百官諸司畢會則坐次又如何為定

此其不可三也臣伏謂是非之議止當歸一若又廣為採摭適足為煩今于國朝典故中取一最明之事足以質定大中祥符五年敕新授僕射于都省上事日僕射尚書丞郎郎中員外三司使副學士兩省御史臺文武諸司常參官並集省內幕次以俟僕射自正衙退將至都省堂門外下馬朝廷差人前導諸行尚書丞郎郎中員外郎並于都堂門內分左右列班迎候僕射判案訖知班引贊官報班次定禮生贊三司使次學士次兩

省待制次三司副使賀此則雖赴本省自有次序之別
臣竊詳禮院御史臺兩奏各有未安請自今凡尚書省
會議如止集本省官則帶職者皆赴依在朝兩制班列
別作一行而坐春秋之義王人雖賤必敘乎諸侯之上
所以尊王命而廣臣恭也今兩制侍從之職皆朝廷拔
擢殊才王命所旌禮當表異況又自分行列非以相壓
亦如僕射上事之儀凡帶絕班之官並赴而別班贊引
不與本省官同在迎班顯合本朝之典章亦非今日之

臆斷若詔兩制臺省諸司諸衛官畢集則各從其類自作一行其書議亦如其坐次上以羣議所執不同故參用所宜而降是詔

治平三年翰林學士承旨張方平奏竊見嘉祐五年諫院陳升之言三班供奉官以下八千八百人乞裁冗濫立條制于時定議事頗酌中升之始言八千八百餘員及此又已五年數當增倍其濫如此而不云救何以立憲度建治功乞下兩府檢討前所奏議早為裁定頒行

亦振舉頽弊之一端詔以付樞密院而計三班使臣六千五百三十四人而已遂無所更議

元祐三年詔文臣繫銜分左右

案九朝編年詔文臣繫銜分左右自朝議至金

紫光祿進士為左餘人為右紹聖二年罷之崇寧二年復分左右繫銜原本誤作繫御紹聖崇寧下俱失載二年兩字自朝議以上進士為左餘人為右明年詔朝議以

下並分左右紹聖罷之惟朝議以上如故崇寧又詔朝議中散正議光祿分左右兩資應轉者先右而後左蓋元祐之分左右所以別流品崇寧之分左右特以序官

爵耳

龍圖閣學士一員

原註大中祥符三年置

龍圖閣直學士七員

原註

內一員兼景德四年置

龍圖閣待制三員

原註景德元年置

直龍圖閣五

員

原註大中祥符九年置

天章閣學士

原註慶曆七年置

侍講

原註自開昌朝始

直天章閣

原註政和

六年始置

大觀二年二月十三日詔曰朕惟哲宗皇帝英文睿武

神機獨運道與時俱沉潛無方然事天治人彰善瘴惡

訓迪有位綏靖邊方則號令指揮若揭日月蓋自親攬
庶政始大有為一話一言罔不儀式刑于神考之典故
緝熙紹復著在簡編與熙寧元豐之所行相為始終比
命有司廣加裒輯成書來上本末粲然誠可傳無窮施
罔極矣若昔祖宗述作皆有寶藏之所參列廣內揭為
嘉名擇儒臣以資訪納今將祇率成憲匹休前烈則夫
名出于信不可無所攷也在詩有之君子有徽猷是為
論德之美而觀道之成于是乎在其哲宗皇帝御集建

閣以徽猷為名仍置學士直學士待制政和六年增置直閣

紹興十年五月七日詔門下恭惟徽宗皇帝躬天縱之睿資輔以日就之聖學因時制治修禮樂恢學校發揮典墳緝熙治具宸章奎翰發為號令著在簡編者煥乎若三辰之文麗天垂光賁飾羣物所以貽謀立教作則萬世者殆與詩書相表裏特加裒輯崇建層閣以嚴寶藏用傳示于永久其閣恭以敷文為名祇適舊章宜置

學士直學士待制直閣以次列職備西清之咨訪為儒
學之華寵其著于令

直秘閣校理自建隆初三館有書萬二千餘卷乾德元
年後平諸國盡收其圖書以實三館先是朱梁都汴正
明中始以右長慶門東北廬舍十數間列為三館湫隘
卑濕纔蔽風雨周廬微道出于其側衛士駟卒朝夕喧
雜歷代以來未遑改作每諸儒受詔有所諭撰即移于
他所始能成之太平興國初太宗因幸三館顧左右曰

若此之陋豈可以蓄天下圖籍延四方之士耶詔經度
左升龍門東北舊車輅院別建三館命中使督其役制
度皆上所規畫二年三月書院成盡徙舊館之書以實
之凡八萬餘卷端拱元年詔分三館之書萬餘卷別為
書庫目曰秘閣以吏部侍郎李至兼秘書監
案吏部原本
本誤作禮
部攷東都事略李至傳至授禮部侍郎遷吏
部為秘書監長編亦作吏部今據以改正
右司諫直
史館宋泌兼直秘閣右贊善大夫史館檢討杜鎬為校
理而直秘閣秘閣校理之官始于此

秘書省監少監丞各一人監掌古今經籍圖書國史實錄天文歷數之事少監為之貳而丞參領之其屬有五著作郎一人著作佐郎二人掌修纂日歷秘書郎二人掌集賢院史館昭文館秘閣圖籍以甲乙丙丁為部各分其類校書郎四人正字二人掌校讎典籍刊正訛謬各以其職隸于長貳惟日歷非編修官不預歲于仲夏曝書則給酒食費尚書學士侍郎待制兩省諫官御史並赴遇庚伏則前期遣中使諭旨聽以早歸大典禮則

長貳預集議所以待遇儒臣非他司比宴設錫予率循
故事宋初置三館長慶門北謂之西館太平興國初于
升龍門東北創立三館書院三年賜名崇文院遷西館
書貯焉東廊為集賢書庫西廊分四部為史館書庫大
中祥符八年創外院于右掖門外天禧初令以三館為
額置檢討校勘等員檢討以京朝官充校勘自京朝幕
職至選人皆得備選以內侍二人為勾當官通掌三館
圖籍事孔目官表奏官掌舍各一人又有監書庫

案監書庫

原本誤作監內庫
今據宋史改正

內侍一人兼監秘閣圖籍孔目官一

人秘閣係端拱二年就崇文院中堂建閣以三館書籍

真本并內出古畫墨蹟等藏之淳化元年詔次三館置

直閣

原註以
朝官充

校理

原註以京
朝官充

以諸司三品兩省五品以

上官一人判閣事直閣校理通掌閣事掌繕寫秘閣所

藏供御人裝裁匠十二人元豐五年職事官貼職悉罷

以崇文院為秘書省官屬始立為定員分案四置吏八

原註崇文院太平興國三年置端拱二年建秘閣于院
中昭文館史館集賢院皆沿唐制立名但有書庫寓于

崇文院廡下三館祕閣崇文院各置貼職官又有集賢殿修撰直龍圖閣校勘通謂之館閣初英宗謂輔臣曰館閣所以育雋材比選數人出使無可者豈乏材耶歐陽修曰今取材路狹館閣止用選人編校書籍故進用稍遲上曰卿等各舉數人雖親戚世家勿避于是宰相琦公亮參知政事修舉各薦五人未及試神宗登極先召十人試以詩賦而開封府界提點陳汝義別以奏對稱旨預試于是御史吳申言試館職者請策以經史及世務毋用辭賦遂詔自今試館職專用策論熙寧二年置崇文校書始除河南府永安主簿邢恕乃詔自今應選舉可用人並除校書候二年取旨除館職官五年以隸祕書省

元祐初復置直集賢

院校理自校理而上職有六等內外官並許帶恩數仍

舊又立試中人館職法選人除正字京官除校書郎

原註

校書郎供職二年除集賢校理祕書郎著作佐郎比集賢校理著作郎比直集賢院直祕閣丞及三年除祕閣校理

三年二月詔御試唱名日祕書丞至正字升殿侍立九月復試賢良于閣下五年置集賢院學士并校對黃

本書籍官員

原註紹聖初罷校對以編修日歷選本省易集賢院學士為修撰直院為直祕閣集

賢校理為祕書校理案修撰上宋史有殿字攷紹聖二年易集賢院學士為修撰政和間改為右文殿修撰宋史因誤為殿修撰其實宋時無此稱當以此書為正

十二月詔禮部本省長貳

定校讎之課月終具奏

原註入伏午時減半遇沒伏依舊從蘓軾之請案沒伏宋史

誤作渡伏當從此書為正又罷本省官任滿除館職法元符二年詔

職事官罷帶館職悉復元豐官制崇寧五年詔館閣並

除進士出身人政和五年四月詔秘書省殿以右文為

名

案宋史置右文殿在政和六年此書作五年四月改

集

賢殿修撰為右文殿修撰

案集賢殿修撰下原本脫為右文殿修撰六字今據宋史

增入是月駕詣景靈宮朝獻還幸秘書省詔曰延見多士

歷覽藏書之府祖宗遺文在焉屋室淺狹甚非稱太平

右文之盛宜重行修展八月詔秘書省移于新左藏庫

以其地為堂七年詔類集所訪遺書名曰秘書總目宣

和二年立定秘書省員額監少監丞依元豐舊制著作
郎以四員為額校書郎二員正字四員渡江後制作未
遑紹興元年始詔置秘書省權以秘監或少監一員丞
著作郎佐各一員校書正字各二員為額續又參酌舊
制校書郎正字召試學士院而後命之自是採求闕文
補綴漏逸四庫書略備即秘書省復建史館以修神宗
哲宗實錄選本省官兼檢討校勘以侍從官充修撰五
年徵唐人十八學士之制少監丞外置著作郎佐秘書

郎各二人校書郎正字通十二人又移史館于省之側
別為一所以增重其事九年詔著作局惟修日歷遇修
國史修實錄則開實錄院以正名實十三年詔復每歲
曝書會是冬新省成少監游操援政和故事乞置提舉
官遂以授禮部侍郎秦熺令掌求遺書仍鑄印以賜置
編定書籍官二人以校書郎正字充孝宗即位詔館職
儲養人才不可定員乾道九年正字至六員淳熙二年
少監並置皆前所未有除少監丞外以七員為額尋復

詔不立額

案乾道淳熙係孝宗年號與江陽譜所云起建隆迄宣和者已不合至下文所記紹熙係

光宗年號非李昉所及見當是後人所增

紹熙二年館職闕人上令召試二

員謹加審擇取學問議論平正之人自是少監丞外多

止除二員是時陳傅良上言請以右文秘書閣修撰并舊

館閣校勘三等為史官自校勘供職稍遷秘書閣修撰又

遷右文在院三五年如有勞績就遷次對庶幾有專官

之效無冷局之嫌時論避之然不果行中興分案四曰

經籍曰祝版曰知雜曰太史吏額都副孔目官二人四

庫書官二人表奏官書庫官各一人守當官二人正名
楷書五人守闕一人正貼司及守闕各六人監門官一
人以武臣充專知官一人

日歷所隸祕書省以著作郎著作佐郎掌之以宰執時
政記左右史起居注所書會集修撰為一代之典舊于
門下省置編修院專掌國史實錄修纂日歷元豐三年
詔宣徽院等供報修注事自今更不供起居院直供編
修院日歷所四年十一月廢編修院歸史館官制行屬

祕書省國史案六年詔祕書省長貳毋得預著作修纂
日歷事進書即繫銜以防漏洩如舊編修院法焉八年
詔吏部郎中曾鞏禮部郎中林希兼著作職事官兼職
自此始元祐五年移國史案置局專掌國史實錄編修
日歷以國史院為名隸門下省更不隸祕書省紹聖二
年詔日歷還祕書省宣和二年詔罷在京修書諸局惟
祕書省日歷所係元豐國史案除著作官專管修纂日
歷之事無定員外其餘案編修日歷書庫官吏並依元

豐法紹興元年初修皇帝日曆詔依修日曆所為名本省長貳通行修纂三年詔宰臣提舉侍從官修撰十一月詔以修國史日曆所為名四年詔以史館為名十年詔依舊制併歸秘書省國史案以著作佐郎修纂舊史館官罷歸原官尋復詔以國史日曆所為名續併修神宗哲宗寶訓隆興元年詔編類聖政所併歸日曆所依舊宰臣提領仍今日曆所吏充行遣

會要所以省官通任其事紹興九年詔秘書省官讎校

國朝會要逐官添給茶湯錢乾道四年詔尚書右僕射
陳俊卿兼提舉編修國朝會要每遇提舉官開院過局
就本省道山堂聚呈文字提舉諸司官承受官主管諸
司官並令國史日歷所官兼五年令本省再加刪定以
續修國朝會要為名九年秘書少監陳騭言編類建炎
以後會要成書以中興會要為名並從之其後接續修
纂並隸秘書省

初紹興三年詔置國史院重修神宗哲宗實錄以從官

充修撰續以左僕射呂頤浩提舉國史右僕射朱勝非
監修國史四年置直史館及檢討校勘各一員五年置
修撰官二員校勘無定員是時國史實錄皆寓史館未
有置此廢彼之分九年修徽宗實錄詔以實錄院為名
仍以宰臣提舉以從官充修撰同修撰餘官充檢討無
定員明年以未修正史詔罷史館官吏併歸實錄院二
十八年實錄書成詔修三朝正史復置國史院以宰臣
兼修侍從官兼同修餘官充編修明年詔國史院以宰

臣提舉置修國史同修國史共二員編修官二員又置都大提舉諸司官承受官諸司官各一員以內侍省官充隆興元年以編類聖政所併歸國史院命起居郎胡銓同修國史二年參政錢端禮權監修國史乾道元年參政虞允文權提舉國史皆前所未有二年詔置實錄院修欽宗實錄其修撰檢討官以史院官兼領四年實錄告成詔修欽宗正史以右僕射蔣芾提舉四朝國史詔增置編修官二員續又增置三員淳熙三年特命李

素以秘書監權同修國史權實錄院同修撰四年罷實

錄院專置史院十五年四朝國史成書詔罷史院復開

實錄院修高宗實錄

案此下所記慶元嘉泰係寧宗年號且有修孝光兩朝實錄事當亦

後人所增

慶元元年開實錄院修纂孝宗實錄六年詔實錄

院同修撰以四員檢討官以六員為額嘉泰元年開實

錄院修纂光宗實錄二年復開國史院自是國史與實

錄院並置矣實錄院吏兼行國史院事點檢文字一人

書庫官八人楷書四人

太史局掌測驗天文攷定厯法之事日具所占以聞歲
頌厯于天下則豫造進呈祭祀冠昏及大典禮則選所
用日其官有令有正有春官夏官中官秋官冬官正有
丞有直長有靈臺郎有保章正其判局及同判則選
五官正以上業優攷深者充保章正五年直長至今十
年一遷惟靈臺郎試中乃遷而挈壺正無遷法其別局
有天文院測驗渾儀刻漏所掌渾儀臺晝夜刻驗辰象
鐘鼓院掌文德殿鐘鼓樓刻漏進牌之事

印歷所掌雕印歷書南渡後並同隸秘書省長貳丞郎
輪季點檢

算學元豐七年詔四選命官通算學者許于吏部就試
其合格者上等除博士中次為學諭元祐元年初議者
謂本監雖準朝旨造算學元未興工其試選學官亦未
有應格竊慮徒有煩費乞罷修建崇寧三年遂將元豐
算學條制修成敕令五年罷算學令附國子監十一月
從薛昂請復置算學大觀三年太常寺攷究以黃帝為

先師自常先力牧至周王朴以上從祀凡七十人四年以算學生併入太史局後入秘書省宣和二年並罷官

吏

案自秘書省以下至此俱見宋史職官志永樂大典則以此為宋朝事實內有光寧兩朝年號當非原書

江陽譜稱攸書成上之緘封副本啟秦檜不報藏于家則是書或為其子孫所增而宋史採之

雍熙元年改匭院為登聞檢院東延恩匭為崇仁檢南招諫匭為思諫檢西申寃匭為申明檢北通玄匭為招

賢檢

案此條見江少虞事實類苑今採錄補入攷九朝編年匭院舊隸諫院至是改為登聞院仍命諫院

今司諫一人主判

此書載之未詳

太宗時始置磨勘差遣院後改為審官院真宗時京朝
官四年乃得遷天聖中方有三年之制而在外任者不

得遷須至京引對乃得改秩明道中始許外任滿歲亦

遷

案九朝編年景德四年七月立京朝磨勘限初令現任京朝官三年方得磨勘遷官大中祥符九年和令

京朝官在外任滿三年當攷課者附驛上聞是三年之制京朝官及外任滿歲得遷皆真宗時事也此書作天聖明道當為仁宗時事與九朝編年互異

時恭謝天地覃恩不隔磨勘有併

遷者于是朝士始多皇祐明堂覃恩隔磨勘人情苦其

不均英宗神宗即位因有恭謝之例

原註一本云太宗用趙普議置攷課

院審官院以分中書之權是也 案宋史趙普卒在淳化三年七月審官院改課院置在四年二月改九朝編年云從蘇易簡之請也此書作趙普或當時普先有此議至是因易簡請始行之也

景祐二年十月辛亥詔曰國家分命羣官外釐庶務每代還于京輦或寓止于客坊雜處羈卑頗罹瀆慢稽信書于往載有朝郎之舊規爰飭攸居用昭予眷宜于京師置朝集院

神宗置大理寺以上府左右院暨司錄獄無以離合訊辯三司混金穀視獄不專詔曰稽參故事宜屬理官初

置大理寺命李清臣為記清臣以為王者立政以詔天下必辭尚體要則書為近迺倣古立言所以導事者詞灑聖奇甚其載上訓之略曰五教未訓五法亟下是曰暴民治用弗格

案此句下疑有脫文

以成上德意先教後刑之叙

上曰卿言逼近經誥

內侍省大中祥符二年內臣冠以省號初補曰小黃門遷內侍黃門遷內侍高班遷內侍高品遷內侍殿頭其極為都都知

案宋史內侍省有都都知有都知有副都知則其極當為都都知原本誤作都知今

據宋史
改正

國朝諸司使止于宣政真宗以內侍李神福有功特置宣慶使以寵之又以劉承珪特置景福殿使名以寵之班在各省使之上又以秦翰久在邊隅宣力勤蓋特置入內都都知以寵異之

唐自開元天寶以後藩鎮屯重兵皆自贍租賦所入名曰送使留州其上供者鮮矣五代疆境偪盛藩鎮益強率令部曲主場院厚斂其屬三司者補大吏以臨之輸額之外頗以入已太祖歷試艱難周知其弊及受命務

恢遠略革弊以漸國初猶循前制牧守來朝皆有貢奉以助軍實乾德三年詔諸州度支經費外凡金帛悉送

闕下無得占留

案長編趙普為相勸上革去其弊申命諸州度支經費外金帛悉送都下無得

占留註云去年已有此詔故云申命與此詳略不同時藩鎮有闕稍命文臣權知

所在場務或以京朝官廷臣監臨凡一路之財置轉運使掌之一州之財置通判掌之為節度防禦團練留後觀察刺史者皆不預簽書金穀之事于是外權削而利歸公上矣其轉運使職位國初但曰勾當某路水陸計

度轉運事官高者則曰某路計度轉運使太平興國初
皆曰使兩省五品以上則為都轉運使又置副使判官
又置同勾當轉運事俄罷諸副使止置使二員明年復
置副使真宗每用兵或令都部署兼都轉運使或提點
轉運事及車駕巡狩置隨軍轉運使事畢即停真宗嘗
曰天下物宜民間利病惟轉運使得以周知當召見訪
問外事上又嘗戒諸路轉運使曰汝等所至點檢公事
固是常職若州郡相承弊事但且改正切勿亟行刑罰

致其滋蔓害及無辜也

景德元年詔權三司使丁謂等取戶稅條敕及臣民所陳農田利害刪定成農田敕五卷上之二年謂等又取唐開元中宇文融請置勸農判官檢校戶口田土偽濫等事且言別置官慮益繁擾而諸州長吏職當勸農乃請少卿監刺史閤門使以上知州者並兼管內勸農使餘及同判並兼勸農事諸路轉運使副並兼本路勸農使詔可勸農事入銜自此始景德四年正月詔諸路提

點刑獄官為勸農使使臣為副使凡農田事悉領焉置局案鑄印以給之

先是軍巡及馬步院判官皆用郡府吏建隆元年始詔兩京軍巡諸州馬步院判官合吏部流內銓擇選人無遺省聽減兩選補之始用文吏也

乾德三年詔諸州長吏或有煩藉人代判者即于賓佐中擇公幹者充不得更任親從人先是承五代以來領節旄為郡守者多武人皆不知書所至必自置吏謂之

代判政事一以委之用權不法太祖知其弊罷之

五代任官凡曹掾簿尉有齷齪無能以至昏老不任驅策者始注為縣令故天下之邑率皆不治甚者誅求刻剝穢迹萬狀故天下優譁之言多以長官為笑而祖宗深嫉貪吏太祖嘗謂左右曰晉漢之世侯伯恣橫非法招斂百姓田蠶所獲未輸公稅已入權豪之手以至縣令將至有年誅求百端下無所訴國朝以來未革其弊朕每念耕稼之勤苟非兵食所資固當盡復其租稅爾

建隆初始以朝官為知縣其後參用京官或試銜幕職

三班為之

案九朝編年乾德元年六月命朝官知縣大理正奚嶼知館陶監察御史王祐知魏縣楊

應夢知永濟屯田員外子繼徽知臨清常參官知縣自嶼等始此書作建隆初與九朝編年互異自是

懲五代弊政尤重親民之官民政稍稍修舉凡縣事主

簿為之佐尉掌盜賊殺傷之事而自五代以來藩侯補

署親隨為諸藩鎮副鎮都虞候同掌警邏盜竊之事與

縣令抗禮凡公事專達于州縣多闕簿尉建隆三年復

置縣尉主簿掌鄉村盜賊其鎮將所主郭內而已自是

稍統于縣太平興國二年始禁藩侯不得差親隨其鎮將皆以本州將校為之縣尉專治賊盜而民始無擾矣開寶五年縣令猶兼獄廟令尉兼廟丞太平興國中以令錄州官老耄不治者為廟令判司簿尉老耄者為廟主簿

文武換官格○中大夫防禦使○中大夫團練使○中

散大夫刺史

原註係通除七年除團練使

○朝議大夫刺史○奉直

大夫武功大夫遙郡刺史

原註舊皇城使

○朝請大夫武德大

夫遙郎刺史 ○朝散大夫武德大夫遙郎刺史

原註舊內藏庫

使

○朝奉大夫武節大夫遙郎刺史

原註舊莊宅使

○朝請郎

武略大夫

原註舊洛苑使

○朝散郎武義大夫

原註舊西京作坊使

○朝

奉郎武義大夫

原註舊禮賓使

○承議郎武翼大夫

原註舊供備庫副使

○奉議郎武節郎

原註舊莊宅副使

○通直郎武義郎

原註舊禮賓副

使

○宣教郎敦武郎

原註無出身未及三年換修武郎

○宣義郎從義

郎 ○承事郎秉義郎 ○承奉郎忠訓郎 ○承務郎忠翊

郎 案此文武換官格不著何年所定據文獻通攷謂神宗以大中大夫為宰相官故初除執政只授中大夫

自帶職博士左右正言監察御史至太子左右贊善大	史自帶職郎中至員外郎換諸司正使並帶遙郡刺史	少監太常光祿少卿換刺史少卿監換皇城使遙郡刺史	換右職之制秘書監換防禦使太卿監換團練使秘書	郎承節郎承信郎十者並稱使臣宋史職官志載文臣	郎修武郎從義郎秉義郎忠訓郎忠翊郎成忠郎保義	經郎武義郎武翼郎自內殿承制至三班借職為敦武	備庫副使為武功郎武德郎武顯郎武節郎武畧郎武	大夫武經大夫武義大夫武翼大夫自皇城副使至供	庫使為武功大夫武德大夫武顯大夫武節大夫武略	武階舊有正使副使政和易以新名自皇城使至供備	承事郎承奉郎承務郎係京官皆元豐以後之文階也	員外郎承議郎奉議郎通直郎係朝官宣教郎宣義郎	朝散大夫朝奉大夫係正郎朝請郎朝散郎朝奉郎係	夫朝議大夫係御監奉直大夫亦大觀新置朝請大夫	舊為秘書監殿中監之官中奉大夫大觀新置中散大
-----------------------	-----------------------	------------------------	-----------------------	-----------------------	-----------------------	-----------------------	-----------------------	-----------------------	-----------------------	-----------------------	-----------------------	-----------------------	-----------------------	-----------------------	-----------------------

夫中舍洗馬換諸司副使自秘書郎著作佐郎至判司簿尉換內殿承旨至三班奉職以所載與通攷互證文武之階悉合此書于文階不載中奉大夫武階不載武顯大夫武經大夫武功郎即武德郎武顯郎武略郎武經郎武翼郎修武郎又武略大夫武義大夫武翼大夫不著帶遙郎刺史當並由傳寫遺闕

勲臣

太祖義社兄弟○保靜軍節度使楊光義○天平軍節度使同平章事兼侍中石守信○昭義軍節度使兼侍中李繼勳○忠武軍節度使同平章事中書令秦王王審琦○忠遠軍節度使觀察留後劉慶義○左驍衛上

將軍劉守忠○右驍衛上將軍劉廷讓○彰德軍節度

使韓重斌○解州刺史王政忠

案太祖勳臣不止九人此九人中如楊光義劉

慶義劉守忠王政忠四人東都事略及宋史俱無傳石守信諸人傳內亦無義社兄弟之名惟三槐王氏雜錄有云太祖即位方鎮多懼蹇所謂十兄弟者是也可為此義社兄弟之證

配享

太祖室趙普曹彬○太宗室薛居正石熙載潘美○真

宗室李沆王旦李繼隆○仁宗室王曾呂夷簡曹瑋

案

獻通攷載配享功臣自太祖至仁宗十一臣與此同復載英宗二臣韓琦曾公亮神宗一臣富弼哲宗一臣司

馬光徽宗一臣韓忠彥高宗四臣呂頤浩趙鼎韓世忠
張俊孝宗二臣陳康伯史浩光宗一臣葛邲此書不載
富弼司馬光似因南渡後始定議配享故未之及若韓
琦曾公亮之配享英宗則早定自神宗時不當失載必

由傳寫

遺闕



宋朝事實卷九